

SUHANDO PAULUS KAHAA PAKUNO SO UMATI WE TESALONIKA

Kaatono Wamba

Umati marasaeano we kotano Tesalonika sadaa-daa nopoibhaha lalondo. Miina damande'aanea nada amai kahato'ano Kristus kahaa pakuno. Nandoo mie mugauno putae kahato'ano Kristus kahaa pakuno noka-dhadhiamo. Nandoo dua miinamo dakumahadhaa hampano weo fekihi-ndo ingka oleono Ompu napikihatomo.

Patudhuno Paulus ne suhano kahaa pakuno ini, noma'o nopototo bhe suhano kabhao-bhaono. Notangahida deki dakosabaha dapotaami'ao sabaha kasabha bhe kakadee-dee (1:4-10). Nofohatoda dua nofotinda-tindaandae putae kahato'ano Kristus kahaa pakuno miina'o nakuma-dhadhia'a, hampano oleo ana'a nama'indulukie seemie nekonando "Manusia Modai" so mewangino Kristus (2:1-12). Paulus notangahida dua damekatangka kofintaha ne kaparasaeano bhe paise damantawa dae'ondofi kadadi'ando se'o-se'oleo (3:6-15).

Kalengkano suha 1:1-2

1 Suha aini nomai'ao ne insaodi Paulus, Silwanus^a bhe Timotius. Tapakatue so hintimiu umati we Tesalonika, umatino Lahata'ala Amantoomu se'iseno bhe Ompu Yesus Kristus. ²Sio-sio-mo napobhaiangkoomu kabarakati bhe katohopono dadi mai'ao ne Lahata'ala Amantoomu bhe Ompu Yesus Kristus.

Katumpuno lalo bhe guha 1:3-12

³Bhahitie'iku, insaodi tabeano sadhia taefoampe katumpuno lalo ne Lahata'ala mba'inomo hintimiu. Daanumo nopantasimo peda ana'a, kapa'amo kaparasaeano sa'ende-ende, pomoni-monini'a

^a 1:1 Silwanus neanomo dua Silas; Tul 15:40

sapada-pada hintimiu seemieno bhe seemieno dhulu kamatangka. ⁴Kanandoo'anomo sampe ne olotando tombu-tombudo umatino Lahata'ala, sadhia nowose bhake mani taetula-tula'ao sabahamiau potaamiomu bhe kaparasaemiu weo sabhaha kafodee-dee bhe kasabha nenamisimiu.

⁵Kosasawi'ae ini katandainomo no'adhili kabhitahakino Lahata'ala. Hintimiu noabhikoomu Lahata'ala mantasiomu mesua'omu Kafopahinta'ano. Ingka mba'inomo Kafopahinta'ano maitu menamisiomu kakadee-dee. ⁶Lahata'ala no'adhili mpuu, mie modee-deekoomu nabhoosianda dua kakadee-dee. ⁷Hintimiu kumadee-deeno ampa aini nama'angkoomu kalalesa meenei'omu, pedamo dua ne insaodi. Ana'a nakumadhadhia ne oleono Ompu Yesus namotiwaha Wutono mai'ao te surugaa, weo efi ngkalai-lai napoowaowa bhe mala'ekatino kokuasano. ⁸Nahumukumu mie kumiidono mande'aono Lahata'ala bhe pata mangkafino Bhihita Metaano Yesus, Ompuntoomu. ⁹Kahukumu so ne'awando maitu o kabinasa suhue dhamani, ma'anano daokodo'o mai'ao ne wiseno Ompu bhe kuasano kumalabhiano. ¹⁰Ne oleo kahato'ano na'a, Ompu damekakalabhia'e umati mongkilono bhe damenteane kosasawindo marasaeano. Bhe hintimiu dua, kapa'amo bhihita neowa mani parasaea'emoomu.

¹¹Dadi'anomo sadhia tasambahea'angkoomu, sio-siomo Lahata'ala namabhi dadimiu naposahataa bhe kapoindalono, mantasi'anomo so mie toka nebhasino. Sio-siomo dua weo kuasano, Lahata'ala namekako'ulaangkoomu patudhu metaamiau bhe namosangkaangkoomu sabhaha kahadhaano kaparasaemiu. ¹²Ane nada ana'a, neano Ompuntoomu Yesus mekakalabhia'eomu, bhe hintimiu namekalabhiakoomu dua Yesus, hampano rahamatino Lahata'alantoomu bhe Ompu Yesus Kristus.

Hatono manusia foliuno kadai

2:1-12

2 Bhahitie'i, aitu tapugau'ao kahato'ano Ompuntoomu Yesus Kristus bhe so katifohompu'antoomu bhe Anoa. Taesalo mpuu ne hintimiu, ²koise lasao nebhali-bhalii fekihimiu bhe halia'omu mba'inomo nandoo bhihita putae oleono Ompu nohatomo. Bheanea bhihita maitu nomai'ao ne pugauno seemie kosuahano peda anabii, bheanea se'ise kafoguhu, bheanea nomai'ao ne suhando mie kao-kaomo mai'aono ne insaodi. ³Tangkanomo, nada ae maka

dua, koise undaomu dabhohe-bhohe'ikoomu! Kapa'amo pae'o nahumato oleono Ompu ana'a, tetewei nandumandoo wawo kahungga bhalano, dabhahi mie so humunsano kaparasaeando. Tetewei dua seemie manusia foliuno kadai namotiumba wutono, toka nefotantuno so binasano [we narakaa].⁴ Anoa ini mewangino Lahata'ala, namekalangke wutono te wawono sabhaha nekonando ompu bhe nesombaindo manusia. Bhahamoa sampe naengkoha weo Lambuno Lahata'ala maka nakumona wutono Lahata'ala ne wise-ndo mie bhahi.

⁵Ingka kosasawi'ae ini padamo afohatoangkoe'omu wakutuu nandoo kanau bhe hintimiu endefi'ini. Miinamo me'ulai'eomua bhahaa? ⁶Aitu pande'aaneomu o ae tumaangie sampe miina'o nakumadhadhia. Tamaka nahumato tempono nefotantuno so anoa, kane'omo manusia foliuno kadai na'a namotiumba wutono. ⁷Kuasa foliuno kadai ini nokahadhaa mpebunimo seendai-seendai, tamaka sadhia dotaa-taangie. Sembali tumaa-taangie ini madamo damogampie, ⁸kane'omo manusia foliuno kadai na'a namotiumba wutono. Tamaka nahumato Ompu Yesus, manusia ini tanabuso komatemateno, namobinasaane tilangano kumalabhiano. ⁹Hatono manusia foliuno kadai ini noangkafi kahadhaano Kafeompu'ando seetani; naehabu sabhaha pasingara, tanda-tanda tapa mentela bhe giu timente'aono, saneamo so nafobhohe-bhohe'i'ao. ¹⁰Anoa naepake sabhaha akala modai so naefekakolilino'ao totono lalondo manusia so binasano. So kabinasa'ando mba'inomo miina datumahima bhe miina daoasi'ao kabanara so mosalamatida. ¹¹Kanandoo'anomo Lahata'ala nehatoanda kakolilinono lalo, sampe doparasaea ne sabhaha paha ana'a. ¹²Hato pandano, kosasawindo mie tapa marasaeano ne kabanara maitu bhe moindalono habu modai, dae'awa kahukumu.

Damekatangka koehe

2:13-17

¹³Bhahitie'i nemoasi'aono Ompu! Insaodi tabeano sadhia taefoampe katumpuno lalo ne Lahata'ala hampano hintimiu, kapa'amo mpini kabhao-bhaono Lahata'ala nopilikoomu namosalamatikoomu. Kasalamatimiu na'a noangka ne Rohino Lahata'ala fofekangkilono bhe kaparasaeamiu ne kabanara. ¹⁴Ana'amo katisali'i'amiu ne Lahata'ala, mangka'ano ne Bhihita Metaa nefolele mani, neanomo hintimiu mealaomu dua dawu ne kakalabhiano

Ompuntoomu Yesus Kristus. ¹⁵Dadi'anomo bhahitie'i, fekatangka koehemiu, fintaha kansuhu ne kafoina'u netahimamiu ne insaodi, naetaa weo pugau mani naetaa weo suha mani.

¹⁶⁻¹⁷Sio-siomo wutono Ompuntoomu Yesus Kristus bhe Lahata'ala Amantoomu nalumawesi bhe namekatangka lalomiu, neanomo so nehabumiu bhe so nepugau'aomiu sanea metaa'ano. Kapa'amo Lahata'ala nofomoasi'ao; weo kataano lalo nofowa'ao kaposahuna'ao metaa bhe kalawesino lalo suhue dhamani.

Kamesalono Paulus dasumbaheane

3:1-5

3 Panda-pandano bhahitie'i, sambaheha kainsamiomu, sio-siomo bhoasaono Ompu naehimba nalumele bhe datumahima metaa'e, peda ne hintimiu. ²Sambaheha'omu dua sio-siomo Lahata'ala namolapa kainsami mai'ao ne mie modai bhe mie silaka. Kapa'amo suano kosasawindo manusia dokokaparasaesa.

³Tamaka Ompu notiparasaesa. Namekatangka lalomiu bhe nadhugaganikoomu ne modai'ano. ⁴Taparasaesa mpuu ne Ompu putae sabhaha kafoina'u mani habuemoomu bhe humabue'omu kansuhu.

⁵Sio-siomo Ompu namato totono lalomiu lumosangie'omu kanini kaasino Lahata'ala bhe nama'angkoomu sabaha dapotaami peda Kristus.

Koise domantawa

3:6-15

⁶Bhahitie'i, weo neano Ompu Yesus Kristus taesalo kodo'otidaomu kosasawindo bhahitie mantawano bhe pata mangkafino kafoina'u netahimamiu ne insaodi. ⁷Ingka pande'aaneomu tabeano mesandahaomu ne insaodi, kapa'amo insaodi miina tamantawa waktuu taete bhe hintimiu. ⁸Insaodi miina tataomaamo, sadhia tae'oli, pakade mentae mohondo ta'ulei bhe tafekawule-wule keana taembali wowo'omiu. ⁹Tahabu peda amaitu, suano mba'inomo miina takohakua takonisalo, tamaka tapoindalo taehabuangkoomu sandaha so neangkafimiu. ¹⁰Ingka waktuu nandoo kainsami bhe hintimiu, padamo tatangahikoomu peda aini, "Ane o mie no-kiido nakumahadhaa, koise nohumaa'a." ¹¹Kapugau'a mani peda aini hampano tafetingke nandoo mantawano kumiidono kumahadhaano, gunando fisa de'atoro urusundo bhaindo. ¹²Mie medando

ana'a taefe'ulaianda bhe tatangahida weo neano Ompu Yesus Kristus, damotoho lalondo dakumahadhaa neanomo daomaa otindo wutondo.

¹³Hintimiu bhahitie'i, koise mowoowuleomua habu metaa'omu.

¹⁴Ane nandumandoo mie so pata mangkafino pugau mani weo suha aini, tandai'eomu, koise posabhangkaaneomu, noambano'ao.

¹⁵Ampamo kaowu, koise abhie'omu kaewa, tamaka tangahie'omu peda bhahitiemiu.

Kasongkono suha

3:16-18

¹⁶Ompu kamai'ao'ano katohopono dadi. Sio-siomo sadhia nama'angkoomu katohopono dadi ne sabhaha waweno dadimiu. Sio-siomo Ompu sadhia napobhaiangkoomu.

¹⁷Salam mai'ao ne idi, Paulus. Wamba aini abuhiane limaku wutoku, aini katandaino buhiku weo sabhaha suhaku. Pedamo aini kabuhiku.

¹⁸Sio-siomo kosasawimiu itu sadhia napobhaiangkoomu kabarakatino Ompuntoomu Yesus Kristus.